



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сто-
роны 60 зл., $\frac{1}{4}$ стороны 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.;
оголошення малы за 1 мм. 20 гр.,
в тексті 30 гр., перед текстом
40 гр. При місячном и довшом
оголошеню значна знижка.

Конто чекове Нр. 404.155.

Новый политычный курс в Польщі?

Вицепремер инж. Квятковский выголосил в Катовицах дня 24. квітня бесіду, котру живо коментуют варшавскы газеты.

Они подают, же с бесіды той выникат ясно, же в Польщі в коротком часі змінит ся политычный курс и усталают

3 точки нового политычного курсу.

Точки тоты дадут ся коротко так уняти:

1) Мае быти змінена форма народного со-
единения и вмѣсто лучити, як до тепер, людей
с ріжных политычных партий в „О. З. Н.“, мае
ся примінити методу лучения самых партий,
котры потрафят уложити для себе лучну
общественно - господарчо - политычну про-
граму;

2) мае быти змінена виберательна ордына-
ция до законодательных палат и самоуправ-
ных урядов;

3) мают быти переведены новы выборы до
сейму, сенату и самоуправных урядов.

Дальше варшавскы газеты, операючи ся
на рішительном тоні бесіды вицепремера инж.
Квятковского, снуют внесеня

же вицепремер инж. Квятковский ест кан-
дыдатом на шефа будучого правительства,

котрый займе руководство державными спра-
вами по уступлению ген. Славой-Складков-
ского.

Зрозуміла річ, же тепер нитко не бавит ся
в ворожбитство, коли того наступит и о том
не пише ся и не може ся писати.

В каждом разі газеты звертают увагу на
факт, же перед высказанем бесіды в Катови-
цах, вицепремер перебувал через цілый тыж-
день в Спалі, яко гость Г-на Президента Р. П.
В часі того тыжневого побыта в Спалі обсу-
ждено всесторонно внутрешне положене в Поль-
щі и усталено основы новой системы, котры
стали ся фундаментом катовицкого выступ-
ления.

Политычны круги твердят, же основы вы-
сказаны вицепремером инж. Квятковским в
Катовицах сут результатом порозумления всіх
рішающих чинников державных.

Зарядженє бранки войсковой.

В том році отбуде ся в пов. новосандецком
головный асентерунок:

- 1) в Мушині от дня 4. мая до 7. мая т. р.;
 - 2) в Старом Санчі от 9. мая до 14. мая т. р.;
 - 3) в Новом Санчі от 16. мая до 31. мая т. р.;
 - 4) в Грибові от 2. червня до 4. червня т. р.
- Близши информации в афишах.

Килько видає ся на воєнны материялы.

Интересны даны о выдатках на вооружене
подає француска газета „Експельсьюр“.

В трох послідных роках Німеччина, Фран-
ция, Англия, Италия, Польша, Россия и Америкы
выдали на воєнны материялы 654 миллиар-
ды франков (около 110 миллиардов злотых).

Німеччина в том часі выдала 60 миллиар-
дов злотых, т. е. видає рочно около 20 миллиар-
дов злотых.

Франция в том самом часі выдала 11 ми-
лиардов злотых, але она мала сильну флоту,
а Німеччина перед трома роками не мала праві
жадной.

Англия выдала значно больше от Фран-
ции, бо около 22 миллиарды злотых, а

Италия ище больше, бо 29 миллиардов
злотых.

Росию оцінят парыска газета на суму 30
миллиардов злотых, якы мала выдати на воо-
ружене. Газета подає, же помимо тых-великих
сум Совіты мают дальше барз слабу флоту
морску.

Относительно наименьше видає на воору-
жене Америка, котра до недавна откладала
вооружене на другой плян. Аж перед 3-ома
роками переназначила она суму по 5 миллиардов
рочно на воєнны материялы.

Газета подає, же выбіжки в вооруженю
держав будут продолжати ся што наименьше
до р. 1942, бо скорше не потрафят они зреали-
зовати своих великих плянов.

ВОЄННА РАДА НА КРЕМЛІ.

На Кремлі отбыло ся засідане рады воєн-
ной СССР., в котром присутствовали: Сталин,
Молотов, Ворошилов и Ежов. По засіданю Ста-
лин выголосил перед микрофоном бесіду до
представителей автономичных республик о их
обязках.

До Москвы завозвано амбасадоров с Па-
рыжа, Лондона и Праги. Тым разом завозва-
но их не для розстріла, але по того, штобы на-
радити ся с нима, як мают Совіты поступити
в виду послідных событий в Европі и яку по-
зыцию мают они заняти в виду Лиги Народов.

Газеты с Праги доносят, же люде, котры
приіхали до Рыгы с Москвы, оповідают, же в
Москві идут дальши масовы арестования. Крім
того Г. П. У. выдало приписы, якы огранича-
ют выїзд и приїзд до Москвы.

Всі поїзды отїзджаючи и приїзджаючи до
Москвы сут скрупулятно ревидованы через а-
гентов Г. П. У., котры переводят контроль не
лем самых документов але также всіх річей,
якы подорожны мают при собі.

В Москві арештовано 192 священников.

Англицкы газеты росписуют ся широко о
арештованиях священников в Совітах. Под
предлогом шпйонства, диверсии, троцкизма и
т. д. арештовано много высоких церковных до-
стойников.

Газеты подают, же по „чистці“ в армии и
администрации Сталин роспочал гнобити пра-

вославне духовенство. В послідных днях ареш-
товано в самой Москві 192 священников.

Газеты описуют также свята в Совітах и
подают, же в часі Великодных свят отслужено
в 20-ох московских церквах богослужения, ко-
тры были переполнены.

Перед войном в Москві было 454 цер-
квей.

В Редакции „Лемка“ в Крыниці можна
достати ріжны книжочки религиозного со-
держаня.

День ліса.

Каждого року на весну уряджат ся по гдє-яких селах и містах „день ліса“. По штож придумано таке свято и яка єст єго ціль?

Штобы дати отвїт на тото пытанє, мусиме передом призадумати ся над нашою лісовою господаркою и над величиною ґрунту, на-ходячого ся под лісом.

Если ходит о пространство землі залісеной, то Польща занимаєт непослїдне місце. Має она по Росии, Финляндии, Швеции, Німеччині и Франции найбільше ліса. Поверхня ліса выносит 8 миллионов 536 тысяч гектаров, отже больше як 1/5 часть цілого пространства краю. В том числі понад 3 милионы гектаров (3,123,000) єст лісов камеральных, а решта (понад 5 миллионов гектаров) то лісы приватны.

Тоты числа сут потїшаючи и здавало бы ся, же маме ліса аж за дуже и можеме рубати дерева, килько лем захочеме и нияка біда нам не грозит. Так было бы направду, если бы во всіх лісах была добра и рациональна господарка и если бы каждый газда по вырубанию старого дерева, вычистил ґрунт и засадил молоды деревка.

Так было бы, як бы каждый селянин старал ся залісити также всі жбырки и неужиткы, не надаючи ся на пасовиско и не приносячи ниякой користи. Если бы всі так робили, то не лем не грозил бы нам брак ліса, але с каждым роком прибывало бы єго, а через тото увеличал бы ся приватный и державный маєток.

Але на жаль так не єст. Лем камеральны лісы сут добре и рационально ведены, а лісы хлопскы представляют уж тепер страшный образ вынищення. Коли переходит ся по наших горах, видит ся тото знищенє в полной наготі: горы лысы и голы, нїт там дерев и нїт травы, бо дожджева вода сполокала тоненьку верству порошокна и остал сам жбырк и камень. Не дивота отже, же не росне там нич, лем ту и там появлят ся т. зв. брындза.

По горах тых свище за то весело вітер, котрый ломит и выкореняєт решту дерев. Села до недавна тихы о милом и теплом климаті, заміняють ся в студены, вітряны пустыні, в котрых гине всяка садовина.

В селах тых, окруженных давно лісами не чувал передом никто о бурях и вітерницах, а тепер нїт року, штобы раз, а часом и частїйше не нищили ґрунту наглы зливы и вітерницы, котры перевертають дерева и цілы хаты.

О таких зливах о нечуваних передом бурях вітряных читат ся тепер часто в газетах, але никто не думат о том, же причиною их єст вырубанє и вынищенє лісов.

Ліс хоронил наши села от вітру. Ліс змягчал зимовы морозы, ліс задерживал каплі дожджа на галузях дерев и через тото хоронил ґрунт перед наглыма зливами и сполоканєм с ґрунту верхной урожайной верствы.

Ліс отже, як уж видно с того, што выше написано, был великим добром наших сел. Добродїйне діланє ліса єст всяди видне, але доли могут скорше ся без него обыйти. На долах єст и так все теплїйше, отже хоц потягне там часом холодный вітер, он не наносит такой шкоды, як в горах.

Также злива не може змыти ґрунту, бо ґрунт єст ровный. За то в горах по вынищеню ліса повстане пустыня, на котрой нич ся не вродит. Климат и так острый, остудит ся ище больше, а часты зливы змывают ґрунт и понесут урожайны части землі на доли, або аж и до моря. В горах останут голы скалы и жбырки.

О том не сміють забывати тоты, котры дне-

ска вырубуют в лісах дерево без рахунку. Тото мусят памятити, бо иначе их діти будут колиси горко плакати.

Ліс єст по тото, штобы давал користи, але рубати повинно ся лем дерева грубы, дорослы. На місце вырубаних дерев повинно ся засадити малы деревка и не дати лісу знищати ани здичати.

Также всі жбырки, всі неужиткы и кажде неприносяче користи місце повинно ся засадити деревами. Аж втотчас ліс стане ся для каждого с нас и для державы правдивым маєтком, приносячим хосен. Лісы, кромі дерева на будову хат и опал, дають нам также моц грибов и ягод и крют у себе безчисленны лісовы звірята. В лісах збераме постелїне для худобы, ліс отже єст неперебраным жерелом доходу.

Прото тыж ліс вартат того, штобы єго шанувати и подумати о лісовою господарці.

Для звернення увагы широких мас селского населения на користи, плывучи с ліса и на грозячу біду, яка повстане через нерозум-

не вынищенє лісов обходит ся каждого року „день ліса“.

Єст то свято народной господаркы, котре обходит ся не прото, штобы заграля музыка, діти заспівали и люде перешли ся в теплый, весняный день до ліса и там ся погостили, але „день ліса“ має ціль иншу, взнеслу и велику, а именно в том дні населенє повинно ся заинтересовати том важным галузю селского господарства, яком єст ліс и рациональнє єго провадження.

Оден человек не може ту дуже зробити. Аж и власти не могут зарадити злу, яким єст нищенє лісов. Они, правда, выдають зарядженя, забороняючи вырубувати лісы, але трудно им допильновати, штобы всяди тото зарядженє было належито респектованє.

Злу зарадит однак зрозумленє того зла и шкоды через самых людей. Як люде зрозуміють, яку шкоду робят они собі и своим дітям через нищенє лісов, втотчас аж можна буде быти певным, же наши лісы не пропадут и наши горскы села не замінят ся в пустыні.

Кредит на загосподарованє лук.

Краковска Рольна Палата признала на весну т. р. около 500 селянам, жижчим на терені краковского воеводства пожичкы в материялах на поправу лук и пасовиск.

Пожичкы тоты были даны с Фонда Оборотового Реформы Рольной на загальну суму около 53.000 зл. При той помочи переведено поправу близко 400 гектаров лук и пасовиск. С

пожичок тых скористало в першой мірі населенє повітов: новоторского, лимановского и новосандецкого.

В маю т. р. Краковска Палата Рольна (Краковска Изба Рольнича) буде давати дальши кредиты на ціли, звязаны с осушанєм и навоженєм лук и пасовиск.

Управа люцерны.

Найбогатши вроды со всіх трав и коничей дає безспорно люцерна. Прото тыж вартат ся заинтересовати том пожиточном рослином.

Кто хоче посїяти люцерну, мусит однак выбрати под ню добрый фалаток землі, о глубокой почві, где нїт подскорной воды. Земля мусит мати в собі много вапна.

Перед посїянем люцерны треба на перзначеном под люцерну куснику поля посадити рослины окоповы (картофлі, буракы и т. п.) а аж по окоповых поле добре знавозити и посїяти люцерну.

На 1 га ґрунту дає ся 30—40 сотнаров вапна, а на тыждень перед высївом люцерны знавозити супертомасыном и потасовом солю. Супертомасыны (30-процентной) дає ся на 1 га от 200—300 кг., а соли потасовой (20-процентной) около 400 кг. Добре єст дати также около 50 кг. вапневой салитры, штобы рослина мала азот, покаль на єй коренях не вытворят ся бо-родавки, ловлячи азот с повітря.

Так приготовлений ґрунт засїяти люцерном, котра буде рости через пару літ, выдаючи пару покосов рочно. Штобы однак врода не зменьшала ся в слїдующих роках, треба каждого року ґрунт боронити и знавозити супертомасыном (100—150 кг.) и потасовом солю (200—300 кг. на 1 га).

Закрыте границы польско-чешской в звязи с ширячом слиянком.

В звязи с новым появленєм слиянвки в воеводстві краковском, Воевода Краковский зарядил закрыте аж до откликания руху особового на всіх граничных переходах, господарчих и турыстычных в повітах: ясельском, горликом и новосандецком вздож границы польско-чешской.

Новый курс политыкы митр. Шептыцкого.

Во Львові ходят слухы о том, што митрополит Шептыцкий хоче выцофати ся от политыкы и заборонити священникам занимати ся политыком. Проявило ся тото в факті, же митрополит не дал благословеня на оголошенє Божой Матери „Царицом Украины“, чого домогали ся от него украинскы кругы.

Кромі того во Львові придають велике значенє тому обстоятельству, же в посланю гр. кат. епископата по поводу 950-літя крещеня Руси не было ани раз ужите слово „Украина“, або „украинский“.

На Гуцульщині гине худоба от голоду.

С Гуцульщины доносят, же в результаті слабой вроды и долгой зимы дає ся отчути загальныи брак паши на Гуцульщині. В гдєяких місцевостях мало згинути от голоду 25 процент худобы.

Не дуже лучше єст и у нас на Лемкоєщині. С многих сел доносят люде о катастрофальном браку паши. Селяне, штобы ратовати свои статчата, рубают молоду чатину, парят ю и тым кормят худобу. Біда страшна по селах, бо нїт где, ани за што купити потравы.

Лем в селах скомасованих єст кус лучше. Там ище не дає ся так отчути брак паши. Аж тепер переконуют ся люде, же ґрунт в купі дає значно ліпши доходы — як росторганный.

Судьба Буденного: С Москвы доносят, што маршал Буденный сїдит уж в вязниці. Ище недавно был он в Совітах популярный. Єго портреты находили ся в школах и урядах, а пісні о єго славі співали школьны діти. Тепер позривали портреты и дітям приказано забыти пісні. Там скоро мінят ся всео.

Коли належит продавати худобу.

Каждый господар хотіл бы продати свою худобу в найдорозшом часі. Ціна худоби на торгах зависит от многих условий и бывает в рижных порах року рижна. Звычайно однак каждого року о том самом часі осягат худоба найвысшу ціну.

Так нпр. рогата худоба має найвысшу ціну в маю. В том місяці тримат ся висока ціна так для статку до хованя, як и опасеного, перезначеного на заріз. Статок на заріз єст дорогой, бо о том часі єст такого статку мало. Хотячи мати о том часі выпасены волю, треба зачати кормити их уж от лютого, т. е. в том часі, коли паша єст найдорозша.

Таксамо в маю єст найдорозший статок до хованя, бо втотчас зачинат ся выганяти его на пасовиска, где аж до зими може ся обыйти о самой пасовисковой паші.

Найдешевший єст статок в жолтні и листопаді, коли то люде выганяют найбільше статку на продаж.

Свині мають свой найліпший час в другой половині липня и в першой половині серпня. Складают ся на того многи причины. Передовсем на передновку люде не мають чим кормити

свиней и тому єст их мало. Крім того аж и тоты селяне, котры мають откормлены свині, не мають часу їхати с ними на торг, або и не хотят их вывозити, бо єст горячо, а того шкодит свиням.

Найдешовше сут свині в вересні и жолтні, бо ототчас у каждого селянина єст дост пашы, штобы докормити хованы штуку.

Телята сут найдешевши в марті и квітні, бо втотчас єст их найбільше. Найдорозши сут в початках зими.

Бараны и овцы мають добру ціну в початках осени, коли зачинат ся сезон різный тых звірят. Час тот припадат звычайно на початок вересня, пак в жолтні, листопаді и грудні ціна их єст низша. Другым периодом торгівлі овцами єст весна. Ціна овец и ягнят на весну тримат ся дост високо.

Куры, индыкы и инши домашны птахи мають найвысшу в вересні и жолтні.

Знаючи о том, належит так провадити свое господарство, штобы все мати штоси до продажи в найдорозшом часі и штобы купувати худобу втотчас, коли она єст найдешевша.

Sygnatura: Km 795/37.

OBWIESZCZENIE O LICYTACJI RUCHOMOŚCI.

Komornik Sądu Grodzkiego w Muszynie, rewiru Leon Józef Faleński, mający kancelarię w Muszynie, ul. Piłsudskiego, na podstawie art. 602 k. p. c. podaje do publicznej wiadomości, że dnia 17 maja 1938 r. o godz. 10.30 w Krynicy, odbędzie się 2-ga licytacja ruchomości, należących do Mgra Karola Zaufala w Krynicy, składających się z: 3 termosy, 4 pilniki do paznokci, 1 rozpylacz z bal., 7 mydeł toalet., 10 pomadek do ust, 11 p. papieru listowego, 1 kasa „National“, 3 szafy szklone, 1 szafa z lustrami, 1 szafa na specyfiki, lada szkolna, lada aptekarska, 50 fl. aptekarskich, 26 sło, 17 sło porc., waga aptek., odważniki aptek., lakier w puszkach 1/4 kg. 11 szt., biurko twarde, maszyna do pisanja, itd. Ocenienie przed licytacją. Ruchomości można oglądać w dniu licytacji w miejscu i czasie wyżej oznaczonym.

Dnia 22. kwietnia 1938 r.

Komornik

Писма до редакції.

Село Конечна, горлицького повіта

Не буде добра в наших селах.

Село Конечна єст мале и лежить над самым ческом границом. Бідна єст также история нашого села. Маме свою церков, свою школу и свой громадський уряд, а поза тым всі наши sprawy полагаджуєме в сусідном селі Ждыні. Там купуєме товари, бо там єст добра жидовска прабабка, што намножила безліч той жидовины, котра живе с бідного нашого хлопа.

В р. 1937 основали ждынскы господары свой кооператив и назвали его „Едність”. Кооператив розвивал ся добре и мы всі охотно в нем купували, бо ціны были приступны и одынаковы для членов и нечленов и товар добрый. Ишли отже всі до „Едности” и хлопы с самой Конечной за 10 місяцов дали ей много уторговати, бо пересічно каждый с них за тот час заплатил за товар от 100 до 250 зл. Я сам дал уторговати 175 злотых и не задолжил ани гроша, всю заплатил готовыма грошами. В доказ, як конечняне тшили ся „Едністю”, зробил наш маляр для кооператива даром прекрасный шильд и мы всі поперали его.

Так было до весны того року. Недавно спровадил заряд кооператива томасыну и придумал штоси так мудрого, же нас выкуровал от „Едности”. Коли томасына пришла уж до села, нашли ся в заряді мудрагелі, што ухвалили, штобы дати томасыну членам по низшой ціні, а нечленом пораховати ціну вышу. Тото погнівало всіх тых, котры все дотепер купували товари в кооперативы и розбила ся „Едність”. Хлопы с Конечной поїхали до Горлиц до кооператива „Серп” и там закупили 25 метров томасыны, притом переконали ся, же „Серп” продає товари по такой самой ціні так членам як и нечленам. „Серп” дал нам отже томасыну по членской ціні, хоц мы николи в них нияких товаров не купували, а „Едність”, котрой мы дали заробити много гроша, бо долгий час купували мы там все, чого нам было потреба, — казала нам тепер платити ціны выши, бо мы нечлены.

Што хотіл осягнути том мудром ухвалом заряд „Едности”? Чи може хотіл нас примусити вписати ся до кооператива? Если так, то можеме му сказати, же выбрал ся барз глупо.

бо осягнул розультат совсем противный. Конечняне не вписывали ся до „Едности”, бо хотіли перекопати ся, як она буде розвивати ся и як заряд буде господарити кооперативным добром, але ходили до „Едности” и давали ей торговати, приносили отже ей хосен значно больший, як неоден член, котрый дал членской вкладки 15 злотых, набрал товару на кредит за 150 злотых и тепер ани не отдає, ани до кооператива не приходит. Моим розумом, лучше было бы, як бы заряд дбал о тых, хоц бы и нечленов, котры за товар платят ретельно.

Тепер цілу Конечну интересує, як поступит дальше заряд кооператива. Мы не хотіли бы розвивати „Едности”, але заряд мусит зрозуміти, же нам треба дати такы права, якы належат ся доброму покупателеви, же ціна товаров мусит быти однакова для всіх и же не буде в „Едности” „избранных” и „неизбранных”. В противном разі нам не остане нич иншого, лем основати власный sklep, бо до Горлиц нам за далеко, а в своей „Едности” не признают едности.

Если так дальше буде, то не буде добра по наших селах. Хлоп днеска, то не тот давний, сидячий в корчмі и покурючий файку. Он тепер слідит за проявами економічного життя и не даст ся водити за носы.

П. У. господар с Конечной.

Верхомля Велика пов. новасандецкого.

Біда с ляком.

Верхомля Велика, то село знає с того, же люде жили там все в згоді и если часом и завадила о село яка вража агитация, то давали ей все належитый отпор. Так было до войны, так поступали они и в часі світовой войны. Час войны однак отворил хлопам с Верхомлі широко очи на опасность, яка грозит каждому селу через политичне роздвоенє, бо и там зашло пару украинских зайдов, котрых долго будут памятати наши хлопы и жены. Пришли они, як приятелі, мы их приняли як приятелей, а оказалось ся, же через них семох найповажнійших газдов Верхомлі (войта и шестох радных) повішено на придорожных вербах в Пивничной. Смерть тых мучеников держит дальше наше село в єдинстві и згоді. Верхомля отличала ся ище иншим похвальным

свойством. Люде в нас привыкли чтити и шанувати сивы волосы и старый вік. С тым было нам добре. Шанували мы старого нашого егомостя, шанували также дяка, котрый співал при шлюбах и крестинах праві всіх верхомлян.

Аж от недавна змінило ся все в Верхомлі. Нашли ся подмовлены кымси люде, котры почали нарікати на дяка — старика, же уж не може співати, же недовидит и т. д. Вмішав ся до того непотребно и молодой священник, сотрудник — администратор (старый егомость уж сам не занимат ся парохом) и дошло до того, же выбрано нового дяка. На дяка покликал молодой священник украинца родом со Шляхтовой и в селі, где передом была згода и любовь, настала тепер звада, ненависть и баламута.

Одны (тых єст не дуже) сут за новым дяком, за ним єст также священник, а другы, здаючи собі справу с опасності, яка грозит селу через ширеня политичной партийности, хотли бы зарадити злу, покаль оно не закоренило ся ище и не потягнуло за собом нияких жертв.

На том ґрунті пришло до звад и ненависти, котра прибрала такы розміры, же в ночи на 5-го квітня якыйси невысліджений злоумышленник выбил священникови шибы в хаті.

Не одобряє николи напасти и сами болієме над тым, што ся стало. Але виниме также тых, котры довели людей до такого горя, же ктоси поважил ся у нас, в тихом и спокойном селі, в ночи напасти на дом приходский и выбити шибы.

Таке у нас ище не бывало и дай Бог, штобы ся николи не повторило. Факт однак тот нехай буде пересторогом для всіх, же народ тепер змінил ся и не даст нашмирити собі чужой волі. С тым мусят ся числити всі и, где лем можна, ити на руку народови. Повинно ся робити тото в першой мірі в тых случаях, коли народ боронит своего єдинства, своей згоды и любви и боронит ся перед опасностью ненависти. В таких случаях передовсем покликаны сут до того священники, котры для своих политичных цілей не повинни мшати ся в шкодливы для села истории с дяками, с котрыма єст пак біда!

Ліпше позбытися одного дяка со села, як наразити всіх односельчан на того, штобы-єя меже собом гризли и вадили. **Верхомлянин.**

Што чути в світі і в краю

Гитлер против жидом. По прилученю Австрії до Німеччини гитлеровські влади признають лем нежидов. Штобы выказати своє нежидовське походженє, мусит каждый, хто старат ся о посаду, предложити метрыку с поданєм, же его родичи і діди были арийцями, а если кто хоче вступити до партії, то мусит выказати, же его предки от р. 1800 были християнами. Тото зарядженє стало ся причиною, же перед парохияльними урядами тиснут ся толпы людей, стараючи ся о метрыку.

Помер Шаляпин. Недавно помер в Парижі найбільший співак того часу, славный бас, Теодор Шаляпин. Теодор Шаляпин походив с бідной родини і яко хлопець был отданий на науку до шевца. Але непосідуча натура тягнула его в світ і он почав вандроувати по великій Росії. В часі его волокитства познакомил ся з Максимом Горьким і скоро их знакомство перемінити ся в приязнь. Оба бездомны волочили ся от села до села, от міста до міста. Дорогу коротили собі піснями і піснями зарабляли на теплу страву і ночлеги. Але по якоси часі люде почали сторонити от них і замыкали перед ними двери. Пришла біда. Голод і холод являли ся чим раз частийше. В тот час зголосили ся они до дыректора театральної групи в Казані і просили его о прийнятє, яко співаков. По пробі дыректор сказав до Горького, што с него може виробити ся добрый співак, а Шаляпину порадил глядати иншого хліба. Стало ся однак иначе. Шаляпин нашол хліб яко співак.

Внет потом достал ся он до царской оперы і добыл собі славу першого співака на світі. По перевероті в Росії, выхал за границу і дал ся познати во всіх великих містах Европы і Америкы, задивляючи людей своим голосом і артызмом. Прошлого року співав в Польщі в Вильні і Варшаві.

Помер в Парижі, где отбыли ся величавы похороны, яких і в Парижі давно не виділи. Величезны толпы народа проводжали тіло великого гения с православной церкви на кладбище. На гробі зложено масу вінцов, меже котрыма звертал увагу вінец в формі лиры с былых лилий с написом на ленті: „найбільшому артысті столітя — родина Кенігсбергов“.

Призыв до выступлєня против Сталина. От дольного часу якаси тайна радиостация надає в ночи, а часом і вечером авдущии, зверненны против Сталина, Ворошилова, Ежова і их сторонников. Бесіды той стаций старают ся заглушити инши советскы радиостации, однак помимо того нераз чує ся их добре.

Дня 16 квітня стация тота надала бесіду, котра завзывает цілый народ выступити дня 1 мая т. р. против Сталина і товаришей, яко тых котры зрадили жолтневу революцію і выстрєляли наилучших сынов той революции, як Тухачевского, Корка і других.

В бесіді той высказано, же суд над Сталином, Ежовым, Ворошиловым, Кагановичами, Мехлисом і др. отбуде ся дня 1. мая т. р. і завозвано народ, штобы в тот день вышол на дороги і площі і ждал на даний знак.

Пропал без вістей. От пятах неділь ніт никаких вістей о советском послі в Софії, Раскольникові. Раскольников разом с женом і дітином выхал дня 1. квітня в незнаном напрямі. Он таксамо, як і его 17 послов дыпльоматов, попал в немилость.

Ведля неофициальных вістей Раскольников не вернул до Росії. Не знати отже, што ся с ним стало, чи был порванный агентами ГПУ, чи тыж зробил так як Теодор Бутенко і збіжал

4 гроши за мыш. В Бесарабии розмножило ся так много мышей, же громадскы уряды чули ся обовязаны выдати спеціальны зарядженя, приказуючи нищити тоты шкодники і вызначила за каждую штуку по 1 леи (4 гроши) нагороды. Громада Басирямка выдала приказ же каждый господар мусит забити по 10 мышей на 1 гектар ґрунту і принести до уряду громадского мысячи хвосты.

В Палестині все безпорядкы. Перед латинськими святами англицкы войска окружили сильный отділ арабов і убили 60 людей, а понад 100 ранили. Войско англицке вышло без втрат.

В одной арабской кавярні выбухла в перший день свят бомба, котра убила 1 араба і 7-ох ранила.

В жидовском кварталі в Єрусалимі выбух бомбы поранил одного жида.

Над озером Тыберияда подложено бомбу под дом одного высшего англицкого офицера полициі.

Архиепископ Шептыцкий тяжело хворый. В украинскых львовскых кругах говорят о том, же митрополит Шептыцкий ест тяжело хворый.

Священник давал розводы. На цікавый способ заробкованя шмарил ся украинский „пан-вітчик“ Иван Амброзяк с Коломьи. Он дал оголошенє во львовскых газетах, же кто хоче розвести ся с женом, або мужем, нехай зверне ся под адресом „Гавденса“ і тот выстараєт ся ему о розвод перед консысторским судом во Вильні. На тото оголошенє звернуло ся много людей до „Гавденса“, котрым як ся пак выдало, был о. Амброзяк, с просьбом о помоч. О. Амброзяк всім отписывал, што має во Вильні знакомства і жадал по пару злотых. Люде посылали гроши і справа тихла. Полиция заинтересовала ся „розводами“ і о. Амброзяка по переведеню слідства засудил суд на 1½ року вязниці.

Тайный договор француско - кытайскый. Японскы газеты подають, же францускый посол в Кытаю, заключил именем своего правительства с правительством Кытаю умову в справі утворєня в Индокытаю недалеко кытайской

границы летничой базы для кытайскых войск. В замін за тото кытайське правительство дало французам концессии натуры господарчой.

Літо має бути также зимне. Того року труд дожджати ся тепла. Дожджи на перемену со снігом і при том зимны вітри с частыми приморозками в ночи вздержують вегетацию рослин і опоздняють роботы в полі. Метеорольоты приписують тото явленє повстающим на сонци плямам. Плямы такы появляють ся на сонци што 11 літ і в тотчас бывають все зимны літа і слабы урожаи. Так має бити і в тот, а навіт і в будучом року, бо плямы мають задержати ся на сонци аж до конца року 1939.

Замерзла дівчина. В лісі на Гуті коло Крыниці замерзла в ночи на 21 квітня 19-літня дівчина с Чирной новосандецкого повіта. Дівчина была в Крыниці, где продала набіл і вертала над вечером до родного села. Правдоподобно хотіла она отпочати кус под деревом в лісі, через який переходила, (найдену ю неживу, лежачу под деревом) і замерзла. Той ночи был дост сильный мороз.

Ген. Дыбенко розстріляный? Газеты доносят, же советскы власти арештовали около 800 люда, за тото, же слухали тайной радиостации, котра накликує населєнє до повстаня против теперешному порядкови в Советах. Ежов выдал зарядженє, же за ловленє коммуникатов с тайной радиостации грозит кара 10 літ вязниці.

В послідных днях тайна радиостация донесла, же на приказ Сталина в вязниці на Лубяній розстріляно ген. Дыбенка, б. коменданта ленинградского гарнизону.

ОГОЛОШЕНЄ.

Заповіджений на день 7. мая с'їзд мужей довіря Лемко-Союза, отбуде ся в суботу 14 мая о год. 10 перед полуднем с тым самым порядком обряд. Пересунєнє термину наступило с причини спозднєных весняных работ.

Куплю

„РУСКЕ ПАЛОМНИЧЕСТВО“

составлене Алексієм Булка со Скварявы
выдане в Коломьи в р. 1906.

Писати до Админ. „ЛЕМКА“, Крыница 2.

Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

О т д і л е н я: К Р Ы Н И Ц А, тел. 112.
В Е Л И Ч К А, тел. 6.

Всі поручєня входячи в область банковости.

ПОРУЧЄНЯ ДЕВИЗОВЫ
ПОРУЧЄНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.